

MISA DI PLAYA A BASHA ABAO

Na Playa, camina durante e anjanan 1836 te 1849 e famoso Pastoor Emmanuel Romero a dirigi e bida catolico na Aruba, a bini un pastoor nobo na 1863, Pastoor J. A. te Riele cu a keda pastoor te 1879. E tabata anto e companjero di Pastoor de Vries.

Na 1864 Pastoor te Riele a traha un Misa nobo na Playa. Gezaghether van de Bossche a hanja bon, cu e piedranan di un transh bieu di un hoffi di gobierno a bai sirbi pa e Misa nobo. Hende di Noord a carga e piedranan pa Playa.

Nan a pura hopi pa bini clá pa fiesta di S. Francisco, dia 4 di october. Dia 3 di october e Misa nobo a hanja su bendicion solem. Anochi e pastoornan tabata sinta na plenchí ta papia i bebe un cerbez. Pastoor de Vries a bisa: „Caramba, e Misa ta kraak. Takiko esey por nifica?”

Pastoor Smit, cu a bini di Curacao pa asisti e fiesta, a responde: „No ta nada particular; e Misa ta bai sinta”. De Vries no tabata kere esaki: „Broe, mi no ta gusta tal modo di bai sinta di un edificio nobo”. Pastoor Bongers tambe a bisa caba cu e muraya zuid no ta para net.

Su manece Pastoor de Vries a lamta fo'i sonjoi, a tende boroto den cas. Pastoor Bongers, cu a mira caba cu piedra i kalki a cai den e misa nobo, a saca tur hende for di misa manda nan den cas di pastoor pa motibo di e awacero cu tabata cai basta duru.

Awacero a stop 4 or, Pastoor de Vries ta drecha su curpa pa haci Misa di 4 or, pero e ta tarda un poco. E criar a bin jama Pastoor de Vries: „Bini, Pastoor, hende ta warda”. De Vries a bisa: „Si, mi ta bini”. E criar a bolbe bin jama Pastoor de Vries: „Si Pastoor te Riele lo mester a haci e Misa, siguramente l'e a cuminza caba”. Pastoor de Vries a bisa: „Si . . .”. I mes ora un boroto immenso a spanta hende cu tabata para afor; Misa a basha aden. Cas di pastoor ta tembla. Hende ta grita i ta jora. Pastoor de Vries a pruba pa calma hende: „Bosonan mester ta contento i gradici Dios, cu ningun hende tabata den Misa. Djies nos ta bai haci Misa pa gradicimento”.

Henter e muraya zuid a basha abao, huntu cu dak di panchi. Ningun panchi e keda henter. Tur banki i stul a kibra.

Esey tabata fiesta di S. Francisco na 1864. Hopi biahe Pastoor de Vries a baha di S. Cruz pa juda, anima hende, juda carga piedra. Esey tabata e resultado.